

四庫全書

子部

欽定四庫全書

子部
藝文類聚卷一

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官中書_臣李荃

謄錄進士_臣唐燦

欽定四庫全書

子部十一

藝文類聚

類書類

提要

臣等謹案藝文類聚一百卷唐歐陽詢撰詢字信本潭州臨湘人仕隋為太常博士入唐官至太子率更令宏文閣學士事跡具唐書本傳是書據其自序蓋奉詔所作唐書藝文志註今狐德菜袁朗趙宏智同修殆以詢董

其成故相傳但署詢名歟葉大慶考古質疑
論其正月十七日有蘇味道夜遊詩洛水門
有李嶠拜洛詩寒食門有沈佺期宋之問詩
四子皆後人歐陽安得預編之則傳寫又有
所竄亂非盡詢等之舊序稱流別文選專取
其文皇覽編略直書其事文義既殊尋檢難
一是書比類相從事居于前文列于後俾覽
者易為功作者資其用於諸類書中體例最

善凡為類四十有八其中門目頗有繁簡失
宜分合未當如山水部五岳存三四瀆缺一
帝王部三國不錄蜀漢北朝惟載高齊儲官
部公主附太子而諸王別入職官襍文部附
紙筆硯而武部外又別出刀匕首等為軍器
一門道路宜入地部壇宜入禮部而列之居
處鍼宜入器物錢宜附寶玉而列之產業案
几杖扇麈尾如意之類宜入器物而列之服

飾疾病宜入人部而列之方術夢魂魄亦宜
入人部而列之靈異以及茱萸黃連入木部
芙蓉菱藤入草部鴻之外又別出雁蚌之外
又別出蛤鶴之外別出黃鶴馬之外別出騶
駘如斯之類皆不免叢脞少緒又王楙野客
叢書摘其以漢書長陵一抔土事誤抔為杯
收入杯門又摘其蒲柳門中收趙高束蒲為
脯事云出史記史記無此文彭叔夏文苑英

華辨證亦摘其引梁君射白雁事云出莊子
莊子無其語然隋以前遺文秘籍迄今十九
不存得此一書尚略資考證宋周必大校文
苑英華多引是集而近代馮惟訥詩紀梅鼎
祚文紀張溥百三家集從此采出者尤多亦
所謂殘膏賸馥沾溉百代者矣乾隆四十四
年十月恭校上

總纂官臣紀昀臣陸錫熊臣孫士毅

總校官 臣陸費墀

欽定四庫全書

藝文類聚序

叙曰夫九流百氏為說不同延閣石渠架藏繁積周流
極源頗難尋究披條索實日用弘多卒欲摘其菁華採
其旨要事同游海義等觀天皇帝命代膺期撫茲寶運
移澆風於季俗反淳化於區中戡亂靖人無思不服偃
武修文興開庠序欲使家富隋珠人懷荆玉以為前輩
綴集各抒其意流別大選專取其文皇覽偏畧直書其

事文義既殊尋檢難一爰詔撰其事且文棄其浮雜刪其冗長金箱玉印比類相從號曰藝文類聚凡一百卷其有事出於文者便不破之為事故事居其前列文於後俾夫覽者易為功作者資其用可以折衷今古憲章墳典云爾太子率更令弘文館學士渤海男歐陽詢序

欽定四庫全書

藝文類聚卷一

唐 歐陽詢 撰

天部上

天 日月 星 雲 風

天

周易曰太哉乾元萬物資始乃統天雲行雨施品物流
形大明終始六位時成時乘六龍以御天乾道變化各
正性命又曰立天之道曰陰與陽又曰天行健

尚書曰乃命羲和欽若昊天又曰皇天震怒命我文考

肅將天威

禮記曰天地之道博也厚也高也明也悠也久也日月星辰繫焉萬物覆焉

論語曰天何言哉四時行焉百物生焉

老子曰天得一以清

春秋繁露曰天有十端天地陰陽水土金木火人凡十端天亦喜怒之氣哀樂之心與人相副以類合之天人一也

爾雅曰穹蒼蒼天也春為蒼天夏為昊天秋為旻天冬為上天

春秋元命苞曰天不足西北陽極於九故天周九九八十一萬里

渾天儀曰天如雞子天大地小天表裏有水地各乘氣而立載水而浮天轉如車轂之運

黃帝素問曰積陽為天故天者清陽也

莊子曰天之蒼蒼其正色邪其遠而無所至極邪

申子曰天道無私是以恒正天常正是以清明

夫子曰高莫高於天下莫下於澤天高澤下聖人法之

太玄曰有九天一為中天二為羨天三為從天四為更天五為暉天六為廓天七為咸天八為沈天九為成天又曰天以不見為玄

皇覽記曰好道者言黃帝乘龍升雲登朝霞上至列闕倒影經過天宮

禮統曰天地者元氣之所生萬物之祖也

廣雅曰太初氣之始也清濁未分太始形之始也清者為精濁者為形太素質之始也已有素朴而未散也二氣相接剖判分離輕清者為天

呂氏春秋曰天有九野何為九野中央曰鈞天東方曰蒼天東北曰變天北方曰玄天西北曰幽天西方曰皓天西南曰朱天南方曰炎天東南曰陽天

列子曰杞國有人憂天崩墜身無所寄廢於寢食又有

憂彼之憂者曉之曰天積氣耳無處無氣奈何而崩墜
乎其人曰天果積氣日月星宿不當墜也曉者曰日月
星宿亦積氣中之有光曜者正復使墜亦不能有中傷
說苑曰齊桓公問管仲王者何所貴對曰貴天桓公仰
觀天管仲曰所謂之天者非謂蒼蒼莽莽之天也君人
者以百姓為天

白虎通曰天者何也天之為言鎮也居高理下為人鎮
也男女摠名為人天地所以無摠名何天圓地方不相

類也天左旋地右周猶君臣陰陽相對向也

張衡靈憲曰太素之前幽清寂寞不可為象惟虛惟無
蓋道之根也道根既建由無生有太素始萌萌而示兆
斯謂龐洪蓋道之幹也道幹既育萬物成體於是剛柔
始分清濁異位天成於外而體陽故圓以動斯謂天元
道之實也天有元位

徐整三五歷紀曰天地混沌如雞子盤古生其中萬八
千歲天地開闢陽清為天陰濁為地盤古在其中一日

九變神於天聖於地天日高一丈地日厚一丈盤古日長一丈如此萬八千歲天數極高地數極深盤古極長後乃有三皇數起於一立於三成於五盛於七處於九故天去地九萬里

蜀志曰吳使張溫來聘溫問秦宓曰天有頭乎宓曰有之溫曰在何方宓曰詩云乃眷西顧以此推之頭在西方溫曰天有耳乎宓曰天處高而聽卑詩云鶴鳴九臯聲聞于天若其無耳何以聽之溫曰天有足乎宓曰詩

云天步艱難若其無足何以步之溫曰天有姓乎宓曰
姓劉何以然曰其子姓劉以此知之

楚辭天問曰圓則九重孰營度之八柱何當東南何虧

言天有八山為柱皆何當
值東南不足誰虧缺之

日月安屬列星安陳

詩晉傳玄兩儀詩曰兩儀始分元氣上清列宿垂象六
位時成日月西邁流景東征悠悠萬物殊品齊名聖人
憂世實念羣生又天行篇曰天行一何健日月無高蹤
百川赴陽谷三辰回泰蒙又謠曰天時泰兮昭以陽清

風起兮景雲翔仰觀兮辰象日月兮運周俯視兮河海
百川兮東流

賦晉成公綏天地賦曰天地至神難以一言定稱故體
而言之則曰兩儀假而言之則曰乾坤氣而言之則曰
陰陽性而言之則曰柔剛色而言之則曰玄黃名而言
之則曰天地若乃懸象成文列宿有章三辰燭耀五緯
重光衆星回而環極招搖運而指方白虎時據於參井
青龍垂尾於氐房玄龜匿首於女虛朱鳥奮翼於星張

帝皇正坐於紫宮輔臣列位於文昌垣屏絡繹而珠連
三台差池而鴈行軒轅華布而曲列攝提昂峙而相望
贊晉郭璞釋天地圖贊曰祭地肆瘞郊天致禋氣升太
一精淪九泉至敬不文明德惟鮮

表宋顏延之請立渾天儀表曰張衡創物蔡邕造論戎
夏相襲世重其術臣昔奉使入闕值大軍旋旆渾儀在
路肆觀竒秘絕代異寶旋及王府考諸前志誠應夙聞
尚書璇璣玉衡以齊七政崔瑗所謂數術窮天地制作

倖造化經志所云圖憲所本故體度不渝精測尚矣則
七畧運變無匪康時九代貞觀不絕司厯臣夙懷末意
懼于非任今忝惟職統敢昧死以聞

日

易曰日月麗乎天又曰離為日又曰日中則昃月盈則
食天地盈虛與時消息而況於人乎況於鬼神乎毛詩
曰日居月諸胡迭而微

禮記曰玄端而朝日於東門之外

左氏傳曰趙衰冬日之日也趙盾夏日之日也

五經通義曰日中有三足鳥

春秋內事曰日者陽德之母

白虎通曰日行遲月行疾者何君舒臣勞也日月所以懸著何助天行化昭明下地也日月徑千里

風俗通曰成帝問劉向俗說文帝被徵後期不得立日為再中

爾雅曰觚竹北户西王母日下謂之四荒距齊州以南

戴日為丹穴東至日所出為太平西至日所入為太蒙
廣雅曰日名朱明一名耀靈一名東君一名大明亦名
陽烏

說文曰日實也太陽之精字從口一象形也又曰初出
為旭日昕曰晞日溫曰煦日在午曰亭午在未曰昃日
晚曰盱日將落曰薄暮日西落光反照於東謂之反景
在上曰反景在下曰倒景煦日溫也皓日晝也暉日
光也盱日晚也翌日明也曉日白也

易坤靈圖曰至德之明日月若連璧

京房易傳曰日月大光天下和平上下俱昌延年益壽
長世無極

禮斗威儀曰政理太平則時日五色

漢書曰文帝時新垣平言臣候日再中居頃之日却復
中乃更以十七年為元年

列子曰孔子東遊見兩小兒辯鬪問其故一兒曰我以
日始出去人近日中時遠也一兒曰我以為日初出時

遠而日中時近一兒曰日初出大如車輪及其中纔如盤盂此不為遠者小而近者大乎一兒曰日初出滄滄涼涼及其中如探湯此不為近者熱而遠者涼乎孔子不能決也兩兒笑曰孰謂汝多知乎

賈誼書曰湯曰學聖王之道譬其如日靜居而獨思譬其若火夫人舍學聖王之道而靜居獨思譬其去日之明於庭而就火之光於室也然可以小見不可以大知應劭漢官儀曰太山東南名曰日觀日觀者雞鳴時見

日

論衡曰儒者論日旦出扶桑暮入細柳扶桑東方之地
細柳西方之地

家語曰楚王渡江得萍實大如拳赤如日

事具
草部

帝王世紀曰周文王夢日月著其身

瑞應圖曰日月揚光者人君之象也君不假臣下之權
則日月揚光

山海經曰猗天山蘇門山日月所出又曰大荒之中暘

谷上有扶桑十日所浴九日居上枝一日居下枝皆載
鳥又曰有女子名曰羲和浴日於甘泉羲和者帝俊之
妻是生十日

淮南子曰堯時十日竝出草木焦枯堯命羿仰射十日
中其九鳥皆死墮羽翼又曰若木在建木西末有十日華
照下地又曰日出于暘谷浴于咸池拂于扶桑是謂晨
明登于扶桑之上爰始將行是謂朏明至于曲阿是謂
朝明臨于曾泉是謂蚤食次于桑野是謂晏食臻于衡

陽是謂禺中對于昆吾是謂正中靡于鳥次

西南方山名

是

謂小遷至于悲谷是謂晡時廼于女紀是謂大遷經于

泉隅是謂高春頓于連石是謂下春至于悲泉爰息其

鳥是謂懸車薄于虞泉是謂黄昏淪于蒙谷是謂定昏

又曰魯陽公與韓構難戰酣日暮援戈而撓之日反三

舍又曰積陽之熱氣生火火氣之精者為日又曰日中

有跋鳥

跋趾也謂三足鳥也

河圖叶光篇曰積精為日

皇甫謐年歷曰日者衆陽之宗陽精外發故日以晝明

名曰曜靈

楚辭曰暎將出兮東方照吾檻兮扶桑

檻楹也

又曰角宿

未旦曜靈安藏

角東方星也曜靈日也言東方未旦之時藏其精光也

又天問曰

羿焉彈日烏焉解羽又招魂曰十日竝出流金鑠石

詩魏劉楨詩曰仰視白日光皎皎高且懸兼燭八紘內

物類無頗偏

晉張載詩曰白日隨天廻暎暎圓如規踴躍湯谷中上

登扶桑枝又詩曰十日出湯谷弭節馳萬里經天曜四海倏忽潛濛汜

晉傅玄詩曰湯谷發清曜九日棲高枝願得並天御六龍齊玉羈

梁李鏡遠詩曰始臨東岳觀俄昇若木枝萍實詎儔彩合扇且慚規北林耿初曜員窻鑒早曦照庭餘雪盡映簷溜滴垂徘徊匝花樹煜爚滿春池柳陰裁靡靡簾影復離離曾泉豈停舍桑榆忽在斯迴戈安得中長繩不

可羈冲情愛景落清宴惜光馳溫暉徒已荷深心竊自
知

梁劉孝綽詠日應令詩曰弭節馳湯谷照耀出扶桑園
葵一何幸傾葉奉離光

譌後漢李尤九曲譌曰年歲晚暮時已斜安得力士翻
日車

晉傅玄日昇譌詠曰東光昇朝暘羲和初攬轡六龍竝
騰驤逸景何晃晃旭日照萬方皇德配天地神明鑒幽

荒又三光篇曰三光垂象表天地有晷度聲和音響應
形立影自附素日抱玄鳥明月懷靈兔

贊晉郭璞十日贊曰十日竝出草木焦枯羿乃控弦仰
落陽鳥可為感動天人懸符

月

釋名曰月闕也滿則缺也晦灰也月死為灰月光盡似
之也朔蘇也月死復蘇生也弦月半之名也其形一旁
曲一旁直若張弓弦也望月滿之名也日月遙相望者

也

廣雅曰夜光謂之月

山海經曰大荒之中有方山日月所自出也

五經通義曰月中有兔與蟾蜍何月陰也蟾蜍陽也而與兔並明陰係陽也

文選月上軒而飛光

乾鑿度曰月三日成魄八日成光蟾蜍體就穴鼻始明

穴決也決
鼻兔也

尹子曰使星司夜月司時猶使雞司晨也

尚書大傳曰晦而月見西方謂之朏

行疾

朔而月見東

方謂之側匿

行遲

禮記曰月者三日成魄三月而成時

史記天官書曰月行中道安寧和平又曰太陰之精上為月月者天地之陰金之精也

禮舍文嘉曰君致尊而制命則日月貞明

春秋孔演圖曰仁義之道日月循緯

漢書曰元后母李氏夢月入其懷而生后

禮斗威儀曰政太平則月圓而多輝政升平則月清而明

張衡靈憲曰月者陰精之宗積而成獸象蟾兔又曰姮娥奔月是為蟾蜍

淮南子曰月天之使也積陰之寒氣大者為水水氣之精者為月又曰月者陰之宗是以月毀而魚腦滅又曰羿請不死之藥於西王母姮娥竊之奔月宮姮娥羿妻

也服藥得仙奔入月中為月精又曰晝隨灰而月暈闕

以蘆灰隨暈環闕其一又曰方諸見月則津而為水方諸

面則月暈亦闕於上也陰燧大蛤也熟摩拭令熱以向月則水生銅盤受之下水數石也

呂氏春秋曰月羣陰之本月望則蚌蛤實羣陰盈月晦

則蚌蛤虛羣陰摯夫月形於天而羣陰化於淵又曰月

躔二十八宿

文子曰百星之明不如一月之光

京房易飛候曰正月有偃月必有嘉王

皇甫謐年歷曰月羣陰之宗光內日影以宵曜名曰夜光

物理論曰京房說月與星至陰也有形無光日照之乃光如以鏡照日而有影見

舊唐書說曰日猶火也月猶水也火則施光水則含影故
朏生於向日魄生於背日當日則光盈近日則明減
楚辭曰夜光何德死而又育厥利維何而顧兔在腹又
曰何泛濫之浮雲歟擁蔽於明月思耿耿而願見然陰

暄而不達

傅咸擬天問曰月中何有白兔搗藥興福降祉

詩晉陸機詩曰安寢北堂上明月入我牖照之有餘輝
攬之不盈手

宋孝武帝齋中望月詩曰褰幕蕩暄氣入夜漸流清微
微風始發曖曖月初明思因往物深悲以歸雲盈

宋鮑照翫月詩曰蛾眉蔽珠櫳玉鉤隔瑣牕三五二八
時千里與君同夜移衡漢落徘徊帷幌中

齊虞羲詠秋月詩曰影麗高臺端光入長門殿初生似
玉鉤裁滿如團扇泛濫浮陰來金波時不見儻遇賞心
者照之西園宴

梁簡文帝望月詩曰流輝入畫堂初照上梅梁形同七
子鏡影類九秋霜桂花那不落團扇與誰裝空聞北牖
彈未舉西園觴又望月詩曰今夜月光來正上相思臺
可憐無遠近光照悉徘徊

梁孝元帝望江中月影詩曰澄江涵皓月水影若浮天

風來如可泛流急不成圓秦鉤斷復接和壁碎還聯裂
紉依岸草斜桂逐行船即此春江上無俟百枝然

梁邵陵王蕭綸詠新月詩曰霜氛含月彩靄靄下南樓
霧濃光若晝雲駛影疑流

梁沈約詠月詩曰月華臨靜夜夜靜滅氛埃方暉竟戶
入圓影隙中來高樓切思婦西園遊上才網軒映珠綴
應門照綠苔洞房殊未曉清光信悠哉

梁何遜望初月詩曰初宿長淮上破鏡出雲明今夕千

餘里雙蛾映水生的的與沙靜艷艷逐波輕

梁庾肩吾和徐主簿望月詩曰樓上徘徊月窓中愁思
人照雪光偏冷臨花色轉春星流時入暈桂長欲侵輪
願以重光曲承君歌扇塵又望月詩曰桂殿月偏來留
光引上才圓隨漢東蚌暈逐淮南灰渡河光不濕移輪
轍詎開此夜臨清景還承終宴杯

梁蕭子範望秋月詩曰河漢東西陰清光此夜出入帳
華珠被斜筵照寶瑟霜慘庭上蘭風鳴簷下橘獨見傷

心者孤燈坐幽室

梁虞騫視月詩曰清夜未云疲珠簾聊可發泠泠玉潭
水映見蛾眉月靡靡露方垂暉暉光稍沒佳人復千里
餘影徒揮忽

梁劉瑗在縣中庭看月詩曰移榻坐庭陰初弦時復臨
侍兒能勸酒貴客解彈琴栢葉生鬟內桃花出髻心月
光移數尺方知夜已深

梁劉孝綽望月有所思詩曰秋月始纖纖微光垂步簷

瞳矐入牀簾
髣髴鑑窓簾
簾螢隱光息
簾蟲映光織
玉羊東北上
金虎西南旻
長門隔清夜
高堂夢容色
如何當此時
懷情滿胸臆
又林下映月
詩曰明明三
五月垂影當
高樹攢柯半
玉蟾衰葉彰
金兔茲林有
夜坐嘯歌無
與晤側光聊
可書含毫且
成賦又望月
詩曰輪光缺不半
扇影出將圓
流光照潏潏
波動映淪漣

梁鮑泉江上望月詩曰客行鈎始懸
此夜月將弦
川澄光尚動
流駛影難圓
蒼蒼隨遠色
潏潏逐漪漣
無因轉

還汎迴首眷前賢

周王褒詠月贈人詩曰月色當秋夜斜暉映薄帷上弦如半璧初魄似蛾眉渡雲光忽駛中天影更遲高陽懷許掾對此益相思

陳江總賦得三五明月滿詩曰三五兔輝成浮雲冷復輕隻輪非戰返團扇少歌聲雲前來往色水上動搖明况復高樓照何嗟攬不盈

賦宋周祗月賦曰二氣理化精者能鏡陽得一以朗旦

月代終而夕映其狀也氣融潔而照遠質明潤而貞虛弱不廢照清不激汙

宋謝靈運怨曉月賦曰臥洞房兮當何悅滅華燭兮弄曉月昨三五兮既滿今二八兮將缺浮雲褰兮收泛灩明舒照兮殊皎潔墀除兮鏡鑑房櫳兮澄徹

宋謝莊月賦曰陳王初喪應劉端憂多暇悄焉疚懷不怡中夜于時斜漢左界北陸南躔白露曖空素月流天沉吟齊章慙慙陳篇抽毫進牘以命仲宣仲宣跪而稱

曰臣聞日以陽德月以陰靈擅扶光於東沼嗣若英於西溟引玄兔於帝臺集素娥於后庭若夫氣霽地表雲歛天末洞庭始波木葉微脫菊散芳於山椒鴈流哀於江瀨升清質之悠悠降澄暉之靄靄列宿掩緡長河韜映柔祇雪凝圓靈水鏡連觀霜縞周除冰淨歌曰美人邁兮音塵闕隔千里兮共明月臨風歎兮將焉歇川路長兮不可越

梁沈約八詠望秋月曰秋月明如練照曜三爵臺徘徊

九華殿九華玳瑁梁華棖與壁璫以茲雕麗色持照明
月光凝華入黼帳清暉懸洞房先過飛燕戶却映班姬
牀湛秀質兮似規委清光兮如素照愁軒之蓬髮影金
階之輕步居人臨此笑以歌別客對之傷旦暮經衰圃
映寒叢凝清夜帶秋風隨庭雪以偕素與池荷而共紅
照玉墀之皎皎含霜靄之濛濛隱巖崖而半隔出帷幌
而纔通散朱庭之奕奕入青瑣而玲瓏

星

說文曰萬物之精上為列星

尚書考靈曜曰五星若編珠璇璣中星星調則風雨時
春秋說題辭曰星之為言精也陽之榮也陽精為日日
分為星故其字日生為星

尚書洪範曰庶民惟星星有好風星有好雨月之從星
則以風雨

月經于箕則多風
離于畢則多雨也

周禮曰保章氏掌天星以志日月星辰之變動以觀天
下之遷辨其吉凶以星土辨九州之地所封之域皆有

分星以觀妖祥

左氏傳曰魯莊公七年夏四月辛卯夜恒星不見夜明也夜中星隕如雨與雨偕也

春秋運斗樞曰北斗七星第一天樞第二璇第三機第四權第五衡第六開陽第七瑤光第一至四為魁第五至第七為標標合為斗居陰布陽故稱北

尚書中候曰帝堯即政景星出翼

禮稽命徵曰作樂制禮得天心則景星見

春秋元命苞曰嘉置弧北指一大星為老人星治平則見見則王壽常以秋分候之南郊

論語識仲尼曰吾聞堯率舜等遊首山觀河渚有五老飛為流星上入昴

莊子曰傳說得之以相武丁奄有天下乘東維騎箕尾而比於列星

尸子曰自井中視星所見不過數星自丘上以望則見始出也非明益也勢使然也私心井中也公心丘上也

呂氏春秋曰宋景公時熒惑在心公召子韋問焉子韋曰禍當君雖然可移於宰相公曰宰相所與治國家也曰移於民公曰民死寡人將誰為君曰可移於歲公曰歲饑民餓必死為人后而殺其民誰以我為君乎子韋曰君有至德之言三天必三賞君熒惑必徙三舍行七星星當一年君延年二十一矣熒惑果徙三舍

列仙傳曰東方朔楚人也後賣藥五湖知其為歲星焉史記曰天曜而景星見景星德星也其狀無常常出有

道之國

漢書曰五星不失行則年穀豐昌

又曰五星同色天下偃兵百姓安寧歌舞以行不見災疾五穀蕃昌

魏志曰桓帝時有黃星見於楚宋之分後五十年而公

破袁紹之應

事具帝王部

會稽典錄曰嚴遵字子陵與世祖俱受業長安建武六年下詔徵遵設樂陽明殿命宴會暮留宿遵以足荷上

其夜客星犯天子宿明旦太史以聞上曰此無異也昨夜與嚴子陵共臥耳

孫氏瑞應圖曰景星者大星也狀如半月生於晦朔助月為明王者不敢私人則見又曰王者承天則老人星臨其國

李邵傳曰公好天文之術和帝遣使者觀風俗有二使來益州夏夜邵露坐問二人曰君發京師寧知二使何時發二人驚問曰何以知之公指星曰有二使星來向

益部

續晉陽秋曰桓玄庶母馬氏本袁真之妓也與同列薛氏郭氏夏夜同出月下有銅甌水在其側見一流星墮甌中驚喜共視星如三寸火珠於水底罔然明淨乃相謂曰此吉祥也當誰應之於是薛郭更以瓢杓接取竝不得焉最後取星正入瓢中便飲之既而若有感焉俄而懷玄玄雖篡位不終而數年之中榮貴極矣

異苑曰陳仲弓從諸子姪造荀季和父子于時德星聚

太史奏五百里內有賢人聚

詩晉傳玄衆星詩曰朗月竝衆星日出擅其明冬寒地
為裂春和草木榮陽德雖普濟非陰亦不成又詩曰東
方大明星光景照千里少年捨家遊思心晝夜起

北齊邢子才賀老人星詩曰瑞動星光照化穆月輪重
庶徵符祉籙將以贊時邕

贊晉郭璞星圖贊曰茫茫地理燦爛天文四靈垂象萬
類羣分眇觀六沴咎徵惟君

表晉傳玄賀老人星表曰老人星見揮景光明聖主壽
延享祚元吉自天之祐莫不抃舞又賀老人星表曰老
人星見體色光明嘉占元吉弘無量之祐隆克昌之祚
普天同慶率土會歡

晉卞壺賀老人星表曰陛下聖德應乾嘉瑞屢臻玄象
垂耀老人啟徵萬壽無疆

晉王述慶老人星表曰老人星見光色明朗玄象暉煥
表爾休祥率土民庶慶賴罔極

北齊邢子才賀老人星表曰冥貺未已靈應猶臻以某
夜老人星見達旦揚光經旬未減雖三星共色五老同
遊擬之於此故無與匹自非玄風感極聖敬廻天何能
使休徵祕祉相尋而至故以朝夕相趨史無停筆

雲

歸藏曰有白雲出自蒼梧入于大梁

周易曰雲從龍又曰密雲不雨自我西郊又曰坎為雲
毛詩曰英英白雲露彼菅茅又曰蒼兮蔚兮南山朝隰

蒼蔚雲

興也

左氏傳鄭子曰黃帝以雲紀官故為雲師而雲名又曰
凡分至啟閉必書雲物為備故也

易通卦驗曰冬至初陽雲出箕如樹木之狀立春青陽
雲出房如積水春分正陽雲出軫如白鵠穀雨太陽雲
出張如車蓋立夏初陰雲出觜赤如珠夏至少陰雲如
水波寒露正陰雲如冠纓霜降太陰雲出上如羊下如
礎石

禮統曰雲者運氣布恩普也

周禮曰保章氏以五雲之物辨吉凶水旱降豐荒之祲象

二至二分觀雲色青為虫白為
喪赤為兵荒黑為水黃為豐

禮記曰天降時雨山川出雲

東方朔傳曰凡占長吏下車當視天有黃雲來覆車五

穀大熟

河圖曰崑崙山五色雲氣

京房易飛候曰視四方常有大雲五色具其下賢人隱

青雲潤澤在西北為舉賢良

尚書大傳曰於時俊乂百工相和而歌卿雲帝舜乃唱之曰卿雲爛兮糺縵縵兮日月光華旦復旦兮又曰五岳皆觸石而出雲膚寸而合不崇朝而雨

春秋孔演圖曰黃帝之將興黃雲升於堂文命之候玄龍御雲天命於湯白雲入房

事具祥瑞部

孝經援神契曰天子孝天龍負圖地龜出土天孽消滅

景雲出游

事具祥瑞部

史記曰若煙非煙若雲非雲郁郁紛紛蕭索輪囷是謂

卿雲

事具祥
瑞部

漢書曰高祖在碭山上常有雲氣又曰武帝封禪晝有

白雲起封中

事具祥
瑞部

漢武帝故事曰上禪肅然白雲為蓋又曰宣帝祠甘泉

紫雲從西北來散於殿前

事具祥
瑞部

呂氏春秋曰山雲草莽水雲魚鱗旱雲煙火雨雲水氣

無不比類其所生以示人

孫氏瑞應圖曰景雲者太平之應也一曰非氣非煙五

色紛緼謂之慶雲

事具祥瑞部

魏志曰文帝生於沛國譙郡時有雲氣青色而圓如車

蓋當其上終日望氣者以為至貴之證非人臣之氣

莊子曰廣成子謂黃帝曰汝治天下雲氣不待族而雨

又曰華封人謂堯曰夫聖人鵲居而穀食天下有道與

物皆昌乘彼白雲至于帝鄉

事具人部聖篇

孟子曰油然作雲沛然下雨

帝王世紀曰堯母慶都生而神異常有黃雲覆其上

搜神記曰薊子訓到洛見公卿數十處後數十處皆有

雲起

事具神仙部

兵書曰韓雲如布趙雲如牛楚雲如日宋雲如車魯雲如馬衛雲如犬周雲如輪秦雲如行人魏雲如鼠齊雲如絳衣越雲如龍蜀雲如困

楚辭曰雲菲菲而承宇又曰青雲衣兮白霓裳又曰冠切雲之崔嵬

詩魏文帝浮雲詩曰西北有浮雲亭亭如車蓋惜哉時
不遇忽與飄風會吹我東南行行行至吳會

魏劉楨詩曰玄雲起高岳終朝彌八方

晉傅玄詩曰白雲翩翩翔天庭流景髣髴非君形白雲
飄飄捨我高翔青雲徘徊為我愁腸

梁簡文帝詠雲詩曰浮雲舒五色馬腦映霜天玉葉散
秋影金風飄紫烟

梁沈約和王中書白雲詩曰白雲自帝鄉氛氲屢迴沒

蔽虧崑山樹含吐瑤臺月秋風西北起飄我過城闕城
闕已參差白雲復離離皎潔在天漢倒影入華池將過
丹丘野時至碧林垂九重迎飛燕萬里送翔螭

梁吳均詠雲詩曰飄飄上碧虛藹藹隱青林氛氲如有
意縈鬱訐無心又詠雲詩曰白雲蒼梧來過拂章華臺
逢河散復卷經風合且開

賦楚荀況雲賦曰有物於此居則同靜致下則動其高
以鉅圓者中規方者中矩大齊天地德厚堯禹精微於

毫毛充盈於天宇冬日作寒夏日作暑

晉陸機浮雲賦曰有輕虛之艷象無實體之真形原厥
本初浮沈混并六律籥應八風時邁玄陰觸石甘澤霽
霈勢不崇朝露彼無外若層臺高觀重樓疊閣或如鍾
首之鬱律乍似寒門之寥廓金柯分玉葉散綠翹明巖
英煥鸞翔鳳翥鴻驚鶴奮鯨鯢泝波鯨鰐衝遁朱絲亂
紀羅桂失領飛仙凌虛隨風遊騁有若芙蓉羣披薜華
揔會車渠繞理馬腦緡文又白雲賦曰攄神景於八幽

合洪化乎烟煴充宇宙以播象協元氣而齊勲發憤靈
石擢性洪流興曜曾泉升跡融丘盈八紘以餘憤雖彌天
其未泄豈假期於遷啓邁崇朝而倏忽紅藥發而齒齒
金翹援而含葩神收鬼化弼性違序鳥殊類而比栖獸
異跡而同處蛟引翳而竝潛龍攀鴻而雙舉鸞舞角以
軒罷鷺企翮而延佇長城曲蜿蜒采閣相扶聳瑤臺之截
薛構瓊闥之離婁雄虹矯而垂天翠鳥軒而扶日

晉成公綏雲賦曰於是玄氣仰散歸雲四旋冰消瓦離

奕奕翩翩去則滅軌以無迹來則幽闇以杳冥舒則彌
綸覆四海卷則消液入無形或狎獵鱗次參差交錯上
捷業以梁倚下壘碗而相薄狀歲鬼其不安吁可畏而
欲落或粲爛綺藻若畫若規繁縟成文一續一離或繡
文錦章依微要妙緜邈凌虛輕翔浮漂

晉楊乂雲賦曰天地定位淳和肇分剛柔初降陰陽網
緼於是山澤通氣華岱興雲則縹緲翩翩綿鬱若升烟蹇
槃縈以詰屈兮若虬龍之蟠蜿疑岐岐以岳立兮狀有

似乎列仙東西絡繹南北油膏隨風徘徊流行菴藹豁
兮仰披杳兮四會凝寒冰於朱夏飛素雪於玄冥灑膏
液於天漢騰鴻臚於泰清乾坤以之交泰品物以之流
形江海以之深滿川谷以之豐盈毛羽以之光澤草木
以之葩榮萌芽以之挺殖苗秀以之積成始於觸石而
出膚寸而征終於霑濡六合浸潤羣生蕩滌塵穢含吐
嘉祥施暢凱風惠加春陽擬神化於后土與三曜兮齊
光

贊魏陳王曹植吹雲贊曰天地變化是生神物吹雲吐
潤浮氣翳鬱

風

爾雅曰四氣和為通正謂之景風南風謂之凱風東風
謂之谷風北風謂之涼風西風謂之泰風

尚書曰休徵聖時風若

若順也君能通理則曰風順時也

又曰周公居

東二年天大風禾盡偃大木斯拔王啟金縢之書迎周
公天乃返風禾盡起

左氏傳曰六鵠退飛過宋都風也

老子曰飄風不終朝

毛詩曰習習谷風以陰以雨又曰終風且噎

終日而風為終風

又曰凱風自南吹彼棘心又曰冬日烈烈飄風發發
禮記曰立春之日東風解凍

禮稽命徵曰出號令合民心則祥風至

孝經援神契曰德至八方則祥風至

尚書大傳曰舜將禪禹八風脩通又曰成王時越裳重

譯而來朝曰久矣天之無烈風迅雨意中國有聖人乎
莊子曰列子御風而行泠然旬有五日而後反

國語曰海鳥爰居止於魯國東門之外三日展禽曰今
其有災乎是歲也海多大風

荊州星占曰箕星一名卷舌動則大風至

風俗通曰飛廉風伯也風師箕星也

管公明傳曰公明言樹上已有少女微風其雨應至矣

事具
雨部

周生列子曰夫獨葉之風不應八節

風土記曰六月則有東南長風俗名黃雀長風時海魚變為黃雀因為名也

括地圖曰奇肱氏能為飛車從風遠行湯時西風吹奇肱車至於豫州湯破其車不以示民十年西風至乃復使作車遣歸去玉門四萬里

論衡曰儒者論太平瑞應皆言五日一風風不鳴條述征記曰長安宮南有靈臺有相風銅鳥或云此鳥遇

千里風乃動

神仙傳曰葛玄行遇神廟乘車不下須臾有大風逐玄埃塵漲天玄大怒曰小邪敢爾即舉手指風風便止

劉欣期交州記曰風母出九德縣似猿見人若慙屈頸打殺得風還活

風俗通曰風或清明來久長不搖樹本枝葉離地二三丈者此有龍德在其下風或清不及地二三尺者此君子之風

楚辭曰光風轉蕙汎崇蘭

事具草部

又曰嫋嫋兮秋風洞庭

波兮木葉下

十洲記曰炎州在南海中上有風生獸似豹青色狀如
狸以鐵椎鍛其頭數十下乃死張其口向風須臾而起
詩晉庾闡江都遇風詩曰天吳踊靈壑將駕奔冥霄飛
廉振折木流景登扶搖洪川佇宿浪躍水迎晨潮仰眇
感玄雲俯聽聒悲飈

梁簡文帝詠風詩曰飄飄散芳勢汎漾下蓬萊傳涼入

鏤檻發氣滿瑤臺
委朱周邦偃飛鵑
宋都迴亟搖故葉
落屢蕩新花開
暫舞驚鳬去時送
藥香來已拂巫山
雨
何用卷寒灰

梁孝元帝詠風詩曰樓上起朝粧
風花下砌傍入鏡先
飄粉翻衫好染香
度舞飛長袖傳歌共繞梁
欲因吹少女還將拂大王

梁劉孝綽詠風詩曰嫋嫋秋聲習
習春吹鳴茲玉樹煥
此銅池羅帷自舉袖
衿乃披慙非楚侍濫賦雄雌

梁王臺卿詠風詩曰侵淫不可識去來非有情乍見珠
簾卷時覺洞房清暫拂蘭池上湫灩玉塵生一辨雄雌
異還惡庶人輕

梁何遜詠風詩曰可聞不可見能重復能輕鏡前飄落
粉琴上響餘聲

梁庾肩吾詠風詩曰宋地鷗飛初湘川燕起餘掃壇聊
動竹吹薤欲成書蒼梧洞猶在合浦樹應踈陽鳥一轉
翅千里定非虛

梁賀文標詠春風詩曰排簾動輕幔汎水拂垂楊本持
飄落葉翻送舞衣香

陳祖孫登詠風詩曰飄颺楚王宮徘徊繞竹叢帶葉俱
吟樹將花共舞空飄香雙袖裏亂曲五絃中試上高臺
聽悲響定無窮

賦楚宋玉風賦曰楚襄王遊蘭臺之宮宋玉景差侍有
風颭然而至王乃披襟而當之曰快哉此風寡人與庶
人共者耶宋玉對曰夫風生於地起於青蘋之末侵淫

谿谷盛怒於土囊之口緣於太山之阿舞於松柏之下
故其清涼雄風則飄舉升降乘凌高城入于深宮徘徊
於桂椒之間翱翔於激水之上獵蕙草離秦蘅槩新夷
被稊楊北上玉堂經于洞房故其風清清冷冷愈病析
醒發明耳目寧體使人此所謂大王之雄風也夫壅然
起於窮巷之間動沙堰吹死灰此所謂庶人之雌風也
後漢趙壹迅風賦曰惟巽卦之為體吐神氣而成風纖
微無所不入廣大無所不克經營八荒之外宛轉毫毛

之中察本莫見其始揆末莫覩其終啾啾颼颼吟嘯相
求阿那徘徊聲若譌謳搏之不可得繫之不可留

晉李克風賦曰尋之莫見其終迎之莫知其來四方為
之易位八維為之輪迴遊聚則天地為一消散則六合
洞開

晉陸冲風賦曰爰太玄之遐始惟浮沉之剖分詳乾坤
之至德莫風氣之獨尊配無形於大象化萬品於絪縕
釋凝潤於黃壤降霈澤於蒼元生無常域潛無定棲擢

昧聚發尋虛散歸肆六合以騁邁括毫毛而徘徊引沈
性於未萌挫發形於已就宣剛柔之流化導四體之靈
候若乃祝融司節炎精赫奕歛朱唇而長嘯承音響而
來薄猥燭熠以盈扉冽纏繚以結幕九域蕩搖區宇揮
霍

晉湛方生風賦曰有氣曰風出自幽冥蕭然而起寂爾
而停雖宇宙之洪遠倏俄頃而屢經同神功於不疾等
至道於無情胡馬感而增思風母殞而復生啓慘冬之

潛蟄達青春之勾萌因嚴霜以厲威順和澤以開榮故
君德喻其靡草風人假以為名及其猛勢將奮屯雲結
陰洪氣鬱律殷雷發音敷然鼓作拂高陵深天無澄景
嶺無停林六鵠為之退飛萬竅為之哀吟亦有飄冷之
氣不疾不徐颺微扇疊疊清舒王喬以之控鶴列子
以之乘虛若乃春惠始和重褐初釋遨步蘭皋遊眇平
陌響詠空嶺朗吟竹栢穆開林以流惠踈神襟以清滌
軒濠梁之逸興暢方外之冥適

晉江道風賦曰惟渾成之既載兮統天地以資始網宇
宙以結羅兮洞萬形而通紀莫適柔健靡測陰陽於音
固徵在體無方假姿衆象借韻宮商若乃颺厲狂震觸物
怒號卷揚江海迴拔陵峻巨鷗迸懾以退翼爰居喪宿
而遐逃

晉王凝之風賦曰起玄朔之重雲驅東極之洪濤越四
溟而蓬勃經五嶺而蕭條其鼓水也無川不涉靡流不
往溟海天迴江湖雲蕩


齊王融擬風賦曰奄今日采之既移忽今羣景之將馳
靡輕筠之碧葉泛曾松之翠枝總高羽而蕭瑟韻珠露
之參差此烈士之英風長寥亮其如斯

齊謝朓擬風賦曰開翠帷之影藹響行珮之輕鳴揚淮
南之妙舞發齊后之妍聲子雲寂寞叔夜高張烟霞潤
色荃萸結芳斯則幽人之風也

梁沈約擬風賦曰若夫搖玉樹響金扉拂九層之羽蓋
轉八鳳之珠旂時卷瑤臺翠帳乍動佚女輕衣此蓋羽

客之仙風也又八詠曰臨春風春風起春樹遊絲暖如
網落花霏似霧先汎天津池還過細柳枝蝶逢飛搖漾
燕值羽參差揚桂旆動芝蓋開燕裾吹趙帶趙帶飛參
差燕裾合復離迴簪復轉黛顧步惜容儀容儀已照灼
春風復迴薄氛氲桃李花青跗含素萼既為風所開復
為風所落搖綠蒂抗紫莖舞春雪雜流鶯曲房開兮金
鋪響金鋪響兮妾思驚梧臺未陰淇川始碧迎行雨於
高唐送歸鴻於碣石拂明鏡之冬塵解羅衣之秋襪既

鏗鏘以動珮又氛氲而流射始搖蕩以入閨終徘徊而
緣隙明珠簾於繡戶散芳塵於綺席佳人不在茲春風
為誰惜



藝文類聚卷一

欽定四庫全書

子部

藝文類聚卷二

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官中書_臣李荃

謄錄進士_臣唐燦

欽定四庫全書

藝文類聚卷二

唐 歐陽詢 撰

天部下

雪 雨 霽 雷
電 霧 虹

雪

毛詩曰北風其涼雨雪其雱又曰今我來思雨雪霏霏

又曰上天同雲雨雪雰雰又曰雨雪瀼瀼見覲曰消

覲日

也氣

左氏傳曰楚子次于乾谿雨雪王皮冠秦復陶

秦所遺羽衣也

翠被豹舄執鞭以出

山海經曰由首之山小威之山空桑之山竝冬夏有雪

金匱曰武王伐紂都洛邑未成陰寒大雪深丈餘甲子旦不知何五丈夫乘五車從兩騎止門外王使太師尚父謝賓幸臨之尚父使人持一器粥出進五車兩騎軍使者具以告尚父曰五車兩騎四海之神與河伯雨師耳尚父各以其名進之五神皆驚相視而嘆

穆天子傳曰雨雪天子獵于鉞山之西阿又曰北風雨雪天子遊黃室之丘筮獵草澤日中大寒北風雨雪有

凍人天子作黃竹詩

事具文部

晏子春秋曰景公時雨雪三日公披狐白之裘晏子入公曰怪哉雨雪三日不寒晏子曰古之賢君飽而知人饑溫而知人寒公曰善出裘發粟以與饑寒者

王孫子曰昔衛君重裘累茵而坐見路有負薪而哭之者問曰何故也對曰雪下衣薄是以哭之於是衛君懼

見於顏色曰為君而不知民孰以我為君於是開府金
出倉粟以賑貧窮

史記曰東郭先生衣弊履不完行雪中履有上無下足

盡踐地

事具
人部

漢書蘓武傳曰單于幽武置大窖中絕不與飲食天雨
雪武卧齧雪與旃毛并咽之數日不死匈奴以為神

漢武內傳曰西王母云仙之上藥有玄霜絳雪

琴操曰曾子耕太山之下天雨雪凍旬日不得歸思其

父母作梁山歌

論衡曰雲霧雨之徵也夏則為露冬則為霜溫則為雨寒則為雪雨露凍凝者皆由地發不從天降

國策曰魏惠王卒葬有日矣天大雨雪甚至牛目羣臣請弛期太子不許惠子諫曰昔王季葬渦山之尾藥水齧其墓見棺前和文王曰先君欲見羣臣百姓矣乃出為帳三日後葬今先王欲小留而撫社稷故使雪甚弛期而更為日此文王之義也

汜勝之書曰取雪汁以漬原蠶矢漬之五六日釋因摩之雜穀種使稼能早故謂雪五穀之精也

秦子曰今欲馳光日下顯白雪中不可得已

晉諸公贊曰東嬴王騰於常山屯營時大積雪常山門前方數丈融液騰怪而掘之得玉馬高尺餘

錄異傳曰漢時大雪積地丈餘洛陽令身出按行見民家皆除雪出至袁安門無有路謂安已死令人除雪入戶見安僵卧問何以不出安曰大雪人皆餓不宜干人

令以為賢舉為孝廉

皇甫謐高士傳曰焦先野火燒其廬先因露寢遭大雪

至先祖卧不移人以為死就視如故

事具居處部廬篇

世說曰謝太傅寒雪日內集與兒女講論文義俄而雪

驟公欣然曰白雪紛紛何所似兄子胡兒曰撒鹽空中

差可擬兄女曰未若柳絮因風起

語林曰王子猷居山陰大雪夜眠覺開室酌酒四望皎

然因起徬徨詠左思招隱詩忽憶戴安道時戴在剡溪

即便夜乘輕船就戴經宿方至既造門不前便返人間其故王曰吾本乘興而行興盡而返何必見戴

楚辭招魂曰魂兮歸來北方不可以止增冰峨峨飛雪千里又曰霰雪紛其無垠又曰霰雪霏霏糝其增加又曰霰雪紛紛而薄木又曰桂棹兮蘭枻斲冰兮積雪釋名曰雪綏也水下遇寒而凝綏綏然下也

韓詩外傳曰凡草木花多五出雪花獨六出雪花曰霰雪雲曰同雲

西京雜記曰太平之代雪不封條凌弭毒害而已自上而下曰雨雪

左傳曰平地尺為大雪雪有七尺雪

崔鴻北涼錄曰先酒泉南有銅駝出言虜犯者大雨雪沮渠蒙遜遣工取之得銅萬斤

毛詩曰蜉蝣掘閱麻衣如雪

班婕妤怨歌行曰新裂齊紈素鮮潔如霜雪

孫康家貧常映雪讀書清介交遊不雜

宋玉曰陽春白雪國中屬和者不及十人

莊子曰藐姑射山有神人居焉肌膚若冰雪

洛神賦曰飄飄兮若流風之迴雪

詩宋鮑照詠雪詩曰胡風吹朔雪千里度龍山集君瑤
臺裏飛舞兩楹前

齊虞羲望雪詩曰歲杪雲晝昏玄池冰夜結遠風金河
起吹我玉山雪

梁簡文帝雪朝詩曰同雲凝暮序嚴陰屯廣隰落梅飛

四注翻雲舞三襲實斷望如連恒分似相及已觀池影
亂復見簾珠濕又詠雪詩曰晚霞飛銀礫浮雲暗未開
入池消不積因風隨復來思婦流黃素溫姬玉鏡臺看
花言可折定自非春梅又詠雪顛倒使韻曰鹽飛亂蝶
舞花落飄粉匳

梁沈約詠餘雪詩曰陰庭覆素芷南階搴綠施玉臺新
落構青山已半虧

梁任昉同謝朓花雪詩曰土膏候年動積雪表辰暮散

葩似浮玉飛英若總素東序皆白珩西澨盡翔鷺山經
陋塞榮騷人貶瓊樹

梁丘遲望雪詩曰氛氲發紫漢雜沓被朱城倏忽銀臺
構俄頃玉樹生絲絲九軌合昭昭四區明

梁裴子野上朝值雪詩曰沐雪款千門擲風朝萬戶集
霰渝丹散流雲飄繡柱滴瀝垂土膏闌干懸石乳又詠
雪詩曰飄飄千里雪倏忽度龍沙從雲合且散因風卷
復斜拂草如連蝶落樹似飛花若贈離居者折以代瑤

華

梁吳均詠雪詩曰微風搖庭樹細雪下簾隙紫空如霧
轉疑階似花積不見楊柳春徒看桂枝白又詠雪詩曰
雪逐春風來過集巫山野瀾漫雖可愛翻揚詎堪把問
君何所思昔日同心者坐須風雪霽相期雒城下

梁何遜詠雪詩曰凝階似月夜拂曙曉疑春蕭散忽如
盡徘徊已復新若逐微風起誰言非玉塵

梁劉孝綽對雪詩曰桂華殊皎皎柳絮亦霏霏詎比咸

池曲飄飄千里飛
耻均班女扇羞灑
曹人衣浮光亂粉
壁積照朗形闌

梁庾肩吾詠花雪詩曰
瑞雪墜堯年因風入綺
錢飛花灑庭樹凝瑛結
井泉寒光晦八極同雲
暗九天已飄黃竹路共
慶白渠田

陳徐陵詠雪詩曰
瓊林玄圃葉桂樹日南
華豈若天庭瑞輕雪帶
風斜三農喜盈尺六出
儼崇花明朝闕門外
應見海神車

賦晉孫楚雪賦曰堯九載以山栖兮湯請禱於桑林因
二聖以濟世兮孰繁衍以迄今嗟亢陽之踰時兮情反
側以寢興豐隆灑雪交錯翻紛膏澤偃液普潤中田肅
肅三麥實獲豐年

晉李顥雪賦曰何時雪之嘉澤亦應變而俱凝隨同雲
而下降固霑渥之所興

宋謝惠連雪賦曰歲將暮時既昏寒風積愁雲繁梁王
不悅遊於兔園俄而微霰零密雪下王乃歌北風於衛

詩詠南山於周雅相如於是避席而起逡巡而揖曰臣
聞雪宮建於東國雪山峙於西域岐昌發詠於來思姬
滿申歌於黃竹曹風以麻衣比色楚謠以幽蘭儷曲盈
尺則呈瑞於豐年表丈則表沴於陰德連氛累靄揜日
韜霞霰浙瀝而先集雪紛糅而遂多其為狀也散漫交
錯氛氲蕭索藹藹浮浮濛濛奕奕連翩飛灑徘徊委積
始緣甍而冒棟終開簾而入隙既因方而為珪亦遇圓
而成璧眴隰則萬頃同縞瞻山則千巖俱白於是臺如

重壁逵似連璐庭列瑤階林挺瓊樹若乃積素未虧白
日朝鮮爛兮若燭龍銜曜照崑山及其流滴垂冰緣雷
承隅粲兮若馮夷剖蚌列明珠亂曰白羽雖白質已輕
兮白玉雖白空守貞兮未若茲雪因時興滅玄陰凝不
昧其潔太陽曜不固其節節豈我名潔豈我貞憑雲升
降從風飄零值物賦象任地班形素因遇立汚隨染成
縱心皓然何慮何營

周劉璠雪賦曰天地否閉凝而成雪應乎玄冬之晨在

於沍寒之節蒼雲暮同嚴風曉別散亂徘徊雰霏皎潔
違朝陽之曜煦就凌陰之慘冽混二儀而並色覆萬有
而皆空既奪朱而成素實矯異而為同始飄颻而稍落
遂紛糅而無窮曉攝光而映淨夜合影而通曉似北荒
之明月比西崑之閨風

宋謝莊雜言詠雪曰火洲滅日壑清龍闕沙蒸河微雲
驚晷未沈而井闕寓方霾而海溟始益蓋以蕤轉終徘徊
而烟曳狀素鏡之晨光寫金波之夜晰

贊晉庾肅之雪贊曰百籟哀吟廣莫長揮霰雨馭灑皓
雪其霏輕質飄颻與風迴散望之凝映浩若天漢即之
皎潔色踰玉粲

晉羊孚雪贊曰資清以化乘氣以霏遇象能鮮即潔成
暉

宋謝惠連雪贊曰氣遍霜繁年豐雪積彼厲我和爾素
子白其德懿矣玩之庭隙權陋瑤臺暫踐盈尺

梁沈約雪贊曰火競乃上炎陰矯亦下潤獨有凝雨姿

貞晚而無殉排雲寧自高晞光本非恹委谷不辭深因
巖豈知峻潔貌雖同賞英心共誰振

雨

爾雅曰暴雨謂之凍小雨謂之霖霖久雨謂之淫霖謂
之霖

管子曰春發五政一曰論幼孤赦有罪二曰賦爵列
授祿位三曰修溝洫復土人四曰治封疆正阡陌五曰
無殺麋虞無絕華萼五政苟時春雨乃來

尸子曰神農氏治天下欲雨則雨五日為行雨旬為穀
雨旬五日為時雨正四時之制萬物咸利故謂之神

東觀漢記曰沛獻王輔善京氏易永平五年少雨上御
雲臺卦自以周易林占之其繇曰蟻封穴戶大雨將至
以問輔輔曰蹇艮下坎上艮為山坎為水山出雲為雨
蟻穴居時雨將至故以蟻為興居

黃子發相雨書曰常戊申日候日欲入時日生有觀雲
不問大小視四方黑者大雨青者小雨

戰國策曰魏文侯與虞人期獵是日飲酒樂天雨文侯

曰雖樂豈可不一會期哉乃往

事具獵部

楚辭曰雷填填兮雨冥冥又曰令飄風兮先驅使凍雨

兮灑塵

尚書大傳曰天之無烈風淫雨意中國有聖人乎

河圖帝通紀曰雨者天地之施也

曾子曰天地之氣和則雨

山海經曰為應龍之狀乃得大雨

尚書洪範休徵曰肅時雨若

君仁敬則時雨從之

毛詩曰有渰萋萋興雨祁祁雨我公田遂及我私又曰月離于畢俾滂沱矣

左傳曰衛大旱卜有事於山川不吉甯莊子曰昔周饑剋殷而年豐今邢無道諸侯無伯天其或者欲衛討邢乎從之師興而雨

家語曰齊有一足之鳥飛公朝下於殿前舒翅而跳齊侯遣使訪孔子孔子曰此鳥名商羊昔童兒有屈其一

脚振迅兩臂而跳且謠曰天將大雨商羊起舞今齊有之其應至將有水為災

老子曰驟雨不終日

春秋說題辭曰一歲三十六雨天地之氣宣十日小雨應天文十五日大雨以斗運也

山海經曰羽山其上多雨而符陽之山多怪雨雲風之所出也

莊子曰時雨降矣而猶浸灌不亦勞乎

又曰宋景公時大旱三年卜之以人祠乃雨公下堂頓首曰吾所以求雨將自當之言未卒天下大雨方千里者何德於天而惠於民也

六韜曰文王問散宜生卜伐殷吉乎曰不吉鑽龜龜不兆數著著不交而如折將行之日雨輜重車至軫行之日幟折為三散宜生曰此凶四不祥不可舉事太公進曰是非子之所知也祖行之日雨輜重車至軫是洗濯甲兵也

鹽鐵論曰周公太平之時雨不破塊旬而一雨必以夜

列仙傳曰赤松子者神農時雨師也

事具
仙部

謝承後漢書曰百里嵩為徐州刺史境遭旱嵩行部傳

車所經甘雨輒至

事具職官
部刺史篇

管輅別傳曰輅過清河太守時天旱輅曰今夕當雨樹

中已有少女微風樹間又有陰鳥和鳴又少男風起衆

鳥亂翔其應至矣須臾風雲興玄氣四合大雨注傾

風俗通曰玄冥雨師也

論衡曰道至天者祥風起甘雨降雨霽而陰暄者謂之
甘雨

風土記曰六月有大雨名濯枝雨

益部耆舊傳曰趙瑤為閬中令遭旱請雨於靈星應時
大雨

楚國先賢傳曰樊英忽謂學者曰成都市火甚盛因含
水西向噴之後有從蜀郡來者云是日大火須臾大雨

火遂滅

事具
火部

詩魏陳王曹植喜雨詩曰天覆何彌廣苞有此羣生棄
之必憔悴惠之則滋榮慶雲從北來鬱述西南征時雨
中夜降長雷周我庭嘉種獲膏壤登秋畢有成

魏阮瑀詩曰苦雨滋玄冬引日彌且長丹墀自殲殪深
樹猶沾裳客行易感悴我心摧已傷登臺望江沔陽侯
沛洋洋

晉張載霖雨詩曰霖雨餘旬朔濛昧日夜墜何以解愁
懷置酒招親類悲歌結流風逸響迴秋氣

晉張協苦雨詩曰黑蛟躍重川商羊僂野庭飛廉應南
箕豐隆迎號屏雲根臨八極雨足灑四溟霖瀝過二旬
散漫亞九齡階下伏泉湧堂上水苔生尺燼重尋桂紅
粒貴瑤瓊

又雜詩曰金風扇素節丹霞啓陰期騰雲似湧烟密雨
如散絲寒花發黃彩秋陰含綠滋

又雜詩曰朝霞迎白日丹氣臨陽谷翳翳結繁雲森森
散雨足

晉傅玄詩曰徂暑未一旬重陽翳朝霞厥初月離畢積
日遂滂沱屯雲結不解長溜周四阿霖雨如倒井黃潦
起洪波湍深激牆隅門庭若決河炊爨不復舉竈中生
蛙蝦

宋謝莊喜雨詩曰鶯起知風舞礎潤識雲流冽泉承夜
湛零雨望晨浮合潁行盛茂分穗方盈疇

宋謝惠連喜雨詩曰朱明振炎氣溽暑扇溫颺羨彼明
月輝離畢經中宵思此西郊雲既雨盈崇朝上天愍憐

悴商羊自吟謠

宋鮑照喜雨詩曰營社達羣陰屯宮掩積陽族雲飛泉
室震風沉羽鄉升雰浹地維傾潤瀉天潢彌木抽翠條
炎卉耀朱芳闕市欣九賦京廩開萬箱

又苦雨詩曰連陰積澆灌滂池下霖亂沈雲日夕昏驟
雨淫朝旦蹊寧走獸希枝寒鳥飛宴密霧冥下溪聚雲
屯高岸

齊謝朓觀雨詩曰朔風吹飛雨蕭條江上來既灑百常

觀復集九成臺空濛如薄霧散漫似輕埃

梁簡文帝賦得入階雨詩曰細雨階前入灑砌復沾帷
漬花枝覺重濕鳥翻飛遲儻令斜日照併欲似遊絲

梁孝元帝詠細雨詩曰風輕不斷葉雨細未沾衣入樓
如霧上拂馬似塵飛

梁劉苞望夕雨詩曰崇朝邁行雨薄晚屯密雲緣階起
素沫竟水散圓文河柳低未舉山桃落已芬清樽久不
薦淹留遂待君

梁虞騫擬雨詩曰清風送涼氣薄暮蕩炎氛虹照連漪
水電出嵯峨雲落暉散長足細雨織斜文

梁劉孝綽秋雨卧疾詩曰賈君徭役少潘生民務稀及
此同多暇高卧掩重闌寂寂榆桑晚洿池暄不晞電隙
時光帳風簾乍扣扇

梁劉孝威和皇太子春林晚雨詩曰雲樹交為密雨日
共成虹電舒長男氣枝搖少女風葉珠垂滴水檐繩下
溜空蝶濡飛不颺花沾色更紅明離信養德能事畢春

宮誰堪偶鳳吹唯有浮丘公又望雨詩曰清陰蕩暄濁
飛雨入階廊瞻空亂無緒望雷耿成行交枝含晚潤雜
葉帶新光浮芥離還聚泂溫滅復張浴禽飄落毳亂荇
散餘香璫綃挂繡幕象簾列華牀侍童拂羽扇厨人奉
盃觴寄言楚臺客雄風詎獨涼

梁庾肩吾從駕喜雨詩曰西岳浮樽桂東皇事浴蘭赦
詔還京兆歸神出灌壇濕風含酒氣陰雲助麥寒典農
欣受職治粟喜當官復此隨車雨民天知可安

梁朱超對雨詩曰當夏苦炎埃習靜對花臺落照依山
盡浮涼帶雨來重雲吐飛電高棟響行雷灑樹輕花發
滴沼細萍開泛沫紫階草奔流起砌苔

北齊劉逖對雨有懷詩曰重輪宵犯畢行雨旦浮空細
落疑含霧斜飛覺帶風濕槐仍足綠沾桃更上紅無由
似玄豹縱意坐山中

周庾信和趙王喜雨詩曰玄霓臨日谷封蟻對雲臺投
地欲起電倚柱稍驚雷白沙如濕粉蓮花類玉杯驚鳥

灑翼度濕鴈斷行來浮橋七星起高堰六門開厥田終
上上原野自莓莓又喜雨詩曰離光初繞電震氣始乘
雷雲逐魚鱗起渠隨龍骨開崩沙雜水去卧樹擁槎來
嘉苗雙合穎熟稻再含胎又對雨詩曰繁雲猶暗嶺積
雨未開庭堦含侵角路鑊滿溜疏萍濕楊生細樵爛草
變初螢徒勞看蟻封無事祀靈星

陳陰鏗閒居對雨詩曰四溟飛旦雨三徑絕來遊震位
雷聲發離宮電影浮山雲遙似帶庭葉近成舟茅簷下

亂滴石竇引環流寄言一高士如何麥不收

詩曰蘋藻降靈祇聰明諒在斯觸石朝雲起從星夜月
離八川奔巨壑萬頃溢澄陂綠野含膏潤青山帶濯枝
嘉禾方合穎秀麥已分歧寄語紛綸學持竿詎必知

賦魏文帝愁霖賦曰脂余車而秣馬將言旋乎鄴都玄
雲黯其四塞雨濛濛而襲予塗漸如以沈滯潦淫衍而
橫湍豈在余之憚勞哀行旅之艱難仰皇天而太息悲
白日之不暘思若木以照路假龍燭之末光

魏陳王曹植愁霖賦曰迎朔風而爰邁兮雨微微而逮
行悼朝陽之隱曜兮怨北辰之潛精車結轍以盤桓兮
馬躑躅以悲鳴攀扶桑而仰觀兮假九日於天皇瞻沉
雲之決滂兮哀吾願之不將又愁霖賦曰夫何季秋之
淫雨兮既彌日而成霖瞻玄雲之晻晻兮聽長雷之淋
淋中宵夜而歎息起飾帶而撫琴

魏應瑒愁霖賦曰聽屯雷之恒音兮聞左右之歎聲情
慘憤而含歎兮起披衣而遊庭三辰幽而重闕蒼曜隱

而無形雲曖曖而周馳雨濛濛而霧零排房帳而北入
振蓋服之沾衣還空牀而寢息夢白日之餘暉惕中寤
而不效兮意悽悵而增悲

晉潘尼苦雨賦曰氣觸石而結蒸兮雲膚合而仰浮雨
紛射而下注兮潦波湧而橫流豈信宿之云多乃踰月
而成霖瞻中塘之浩汗聽長雷之淅淅始蒙濛而徐墜
終滂霏而難禁悲列宿之匿景悼太陽之幽沈雲暫披
而驟合雨乍息而亟零旦從從以達暮夜淋淋以極明

龜鼉遊於門闥蛙蝦嬉乎中庭懼二源之并合畏黔首
之為魚處者含瘁於窮巷行者歎息於長衢

晉陸雲愁霖賦曰在朱明之季月反極陽之重陰興介
丘之膚寸墜崩雲之洪沉谷風扇而攸遠苦雨播而成
淫天決滌以懷慘民嘖感而愁霖於是天地發揮陰陽
交激萬物混而同波玄黃浩而無質雷憑虛以振庭電
凌牖而曜室雷鼎沸以駿奔潦風馳而競疾豈南山之
暴濟將溟海之暫溢毒甚雨之未晞悲夏日之方永瞻

大晨以積思仰天衢而引領

晉傅咸患雨賦曰夫何遠寓之多懷患淫雨之有經自
流火以迄今歷九旬而無寧庶太清之垂曜覩日月之
光明雲乍披而旋合雷暫輟而復零將收雷之要月棄
嘉穀於已成前渴焉而不降後患之而弗晴惟二儀
之神化奚水旱之有并湯亢陽於七載兮堯汎乎九
齡天道且猶若茲况人事之不平又喜雨賦曰於是祝
融熾景羲和警轡亢陽火憤野無生類悠悠億兆同茲

慘悴伊我皇之仁德兮配燾育於二儀屢刻躬而勤政
兮廣請禱於靈祇孰謂天高其聽不遼孰謂神速厥應
孔昭潔齋致虔于茲三朝陰鬱怫而騰起陽菴夢而自
消飛廉扇谷風之翼翼靈嶽興慶雲之飄飄遂乃重陰
四會冥邈無垠方中降雨亘夜迄今生我百穀粒我蒸
民昔洪水滔天於唐堯之朝亢旱為災於殷湯之世下
民其咨莫能俾乂歷稔九七僅免斯害猶以疇咨為美
談躬禱為勲代

晉成公綏陰霖賦曰百川泛濫潢潦橫流沈寗生龜中
庭運舟又時雨賦曰兩儀協合二氣烟煴洪川起波名
山興雲

宋傅亮喜雨賦曰唯二儀之順動數有積而時偏墊襄
陵於唐籍感雲漢於周篇匪叔葉之或遺在盛王其固
然伊元嘉之初載肇休明於此年懿玉燭之方熙愠積
陽之獨愆涸涼泉於井谷委嘉穎於中田嗟我皇之翼
翼悵臨朝而輟娛踵沖謙於禹湯協至誠於在余且東

作之未晏庶雨露之夙濡遵懸子之徙屢尤魯侯之焚
巫祗桑林之六禱修季宰之再雩誠在幽其必貫感何
遠而不孚聆晨鶴於高垓候宵畢於天隅發曾雲於觸
石晦重陽於八區春霆殷以遠響興雨霈而載塗灑豐
浸於中疇覃餘潤於嘉蔬殷嗇人於菑畝衍將繁於中
衢嗣良頌於多稔兆嘉夢於維魚矧其臣之逢運又均
休而等虞陶曲成於暮稔金歸駕於董疎

梁張績秋雨賦曰霖霖興乎爽節膚寸起於曾岑乃娛

情而悅體猶冬陽與夏陰褰南帷以寓目敞北戶而披襟商律戒於茲辰涼雨感而已作甘泉集而溟溟油雲興而漠漠溫颺草於早暮炎涼改於今昨乍斜檐而上階或從風而灑幕周小庭而密下泣高枝而疎落淥池泛澹員波儵鑠低昂弱篠歲蕤叢薄

霽

說文曰霽雨止也

魏略曰延康元年大霖雨五十餘日魏有天下乃霽將

受大祚之應也

晉中興書曰咸和四年陰霖五十餘日蕪峻滅後乃霽
長沙耆舊傳曰文虔字仲孺時霖雨廢民業太守憂色
虔補戶曹掾虔奉教齋戒在社三日夜夢見白頭翁謂
曰爾來何遲虔具白所夢太守曰昔禹夢繡衣男子稱
蒼水使者禹知水脉當通若掾此夢將可比也明日果
大霽

扶南傳曰金障國入四月便雨六月乃止少有晴日

詩晉嵇含悅晴詩曰勁風歸巽林玄雲起重基朝霞炙
瓊樹夕景映玉枝翔鳳歸輕翮應龍曝纖髻百穀偃而
立大木顛復持

宋謝瞻荅康樂秋霽詩曰夕霽風氣涼閒房有餘清開
軒滅華燭月露皓已盈

梁簡文帝開霽詩曰景落商飈靖烟開四郊謐偃蹇暮
山虹游揚下峯日水紋城上動城樓水中出竟徵共治
功空卧淮陽秩

梁王筠夕霽詩曰連山卷族雲長林息衆籟密樹含綠
滋遙峯凝翠靄石溜正淥潺山泉始澄汰物華方入賞
跋予心期會

周庾信初晴詩曰濕花飛未遠陰雲歛尚低燕燥還為
石龍殘便是泥

賦魏文帝喜霽賦曰乃命駕而言歸啓吉日而北巡厭
羣萌之至願感上下之明神密雲興之坎北甘雨降以
灑塵既灑塵而為塗惟平路之未晞激清風以漂潦發

皎日之揚暉振余策而長驅忽臨食而忘饑

魏陳王曹植喜霽賦曰禹身誓於陽旰卒錫圭而告成
湯感旱於殷時造桑林而敷誠動玉輶而雲披鳴鑾鈴
而日陽指北極以為期吾將倍道以兼行

晉陸雲喜霽賦曰靖屏翳之洪隧戢太山之觸石凌風
絕而謐寧歸雲反而揮霍改望舒之離畢曜六龍於紫
閣於是朱明啓候凱風來南復火正之權司兮默后土
於重陰夷中原之多潦兮反高岍於嵩岑萎禾竦而振

穎兮偃木樹而為林陰陽交泰萬物方道炎神送暑素
靈迎秋四時逝而代謝大火忽其西流年冉冉其易頽
時靡靡而難留

文宋孝武帝祈晴文曰幽明失序就陰則滯連雲霖淫
注而不替潤既違時澤而非惠幸輟霖而吐景權停風
而歛翳昭鑿輅於天郊光龍旂於田際耒耨得施黍稷
獲藝增高廩於嘉年登十千於茲歲

雷

易曰鼓之以雷霆潤之以風雨又曰震為雷動萬物者
莫疾於雷

禮記曰仲春之月日夜分雷乃發聲仲秋之月雷乃收
聲

大戴禮夏小正曰正月雉震鳴鴈鼓其翼也正月必雷
雷不正聞唯雉聞

毛詩曰殷其雷在南山之陽又曰虺虺其雷

左傳曰藏冰以時則雷出不震棄冰不用則雷不發而

震

尚書中侯曰秦穆公出狩天震大雷下有火化為白雀
銜丹書集公車

史記曰高祖母曰劉媪嘗息大澤之陂夢與神遇時雷
電冥晦

山海經曰翔次之山有鳥名橐蜚服其毛羽令人不畏
雷也

淮南子曰陰陽相薄感而為雷

焦贛易林曰白日揚光雷車避藏雲雨不下各自正鄉
物理論曰積風成雷

易曰雷風相薄

洪範五行傳曰夫雷人君象也入能除害出能興利
河圖帝紀通曰雷天地之鼓也又曰黃帝以雷精起
鵬冠子曰夫耳之主聰目之主明一葉蔽目不見太山
兩豆塞耳不聞雷霆

論衡曰圖畫之工圖雷之狀晶晶如連鼓形又圖一人

若力士謂之雷公使之左手引連鼓右手推之

晉陽秋曰王裒母性畏雷及母死每雷震輒就墓側啓
曰裒在此裒在此

盛弘之荊州記曰湖陽縣春秋蓼國樊重之邑也重母
畏雷為石室避之悉以文石為階砌今猶存

王韶孝子傳曰竺彌父生時畏雷每至天陰輒至墓伏
墳悲哭有白兔在其左右

華陽國志曰曹公從容謂先主曰天下英雄唯使君與

操本初之徒不足數也先主方食失匕箸會雷大震先
主曰聖人言迅雷風烈必變良有以也一震之威乃可
致此公亦悔失言

雷於天地為長子以其萬物為出入也雷二月出地百
八十日雷出則萬物出八月入地百八十日雷入則萬
物入入則除害出則興利人君之象也

孟輿北征記曰凌雲臺東南角一百步有白石室名為
避雷室

續搜神記曰義興人姓周永和中出都日暮道邊有一
新草小屋有一女出門望見周曰日已暮周求寄宿向
一更中間外有小兒喚阿香官喚汝推雷車女子乃辭
去明朝視宿處乃見一新冢

爾雅曰疾雷謂之霆

穀梁傳曰陰陽相薄感而為雷激而為霆

五經通義曰震與霆皆霹靂也

公羊傳曰雷疾而甚者為震震與霆皆謂霹靂也雷謂

電之先

易曰天地解而雷雨作雷雨作而萬物草木皆甲坼
山海經曰飛魚如豚赤文無羽食之辟兵不畏雷也
淮南子曰叢輕折軸衆呼成雷又曰庶女叫天而雷下
擊景公臺損支體傷折海水大出

漢書曰桓帝建和二年六月乙卯雷震憲陵寢屋是梁
太后聽兄冀枉誅喬也

蔡順母平生畏雷自亡後每有雷輒環冢泣曰順在此

論衡曰雷霆迅疾擊折樹木壞敗屋室時犯殺人俗以
為天取龍其犯殺人謂之有陰過

雜兵書曰雷電霹靂破軍內若樹木屋舍急徙去吉也
雷電風所從來不可逆而伐宜慎之

論語識曰雷震百里聲相附近宋均注曰雷動百里故
因以為言也雷聲謂諸侯之政教所至相附近也

說文曰雷霆餘聲鈴鈴所以挺出萬物也

詩晉傳玄雜言詩曰雷隱隱感妾心傾耳清聽非車音

又曰童女掣電策童男挽雷車又驚雷歌曰驚雷奮兮
震萬里威陵宇宙兮動四海六合不維兮誰能理

晉李顥雷賦曰伊有陽之聲化兮陶萬殊於天壤結鬱
蒸而成雷兮鼓旬稜之逸響若乃駭氣奔激震響交搏
潰淪隱嶢崩騰磊落來無轍迹去無阡陌君子恐懼而
修省聖人因象以制作

電

毛詩曰熒熒震電

易曰離為電又曰雷電噬嗑

月令曰仲春始電

晉書曰王戎視日不眩目爛爛若巖下電

山海經曰列缺電名

莊子曰陰氣伏於黃泉陽氣上通於天陰陽分爭故為
電玉女投壺天為之笑則電

河圖握拒起曰大電繞樞星炤郊野感符寶而生黃帝

事具符

命部

淮南子曰電以為鞭策

雷激氣也

甘泉賦曰電條閃於牆藩

賦晉顧凱之雷電賦曰太極紛綸元氣澄練陰陽相薄
為雷為電是以宣尼敬威忽變夫其聲無定響光不恒
照砰訇輪轉儵閃羅曜若乃太陰下淪少陽初升蟄蟲
將啓動靈先應殷殷徐振不激不憑林鍾統節溽暑烟
煇星月不朗衣裳若焚爾乃清風前颭蕩濁流塵豐隆
破響列缺開雲當時倦容廓焉精新豈直驚安竦寐乃

以暢精悟神天怒將凌赤電先發窺巖四照映流雙絕
雷雷赫以驚衛山海磕其崩裂

霧

爾雅曰地氣發天不應曰霧霧謂之晦

帝王世紀曰黃帝時天大霧三日帝遊洛川之上見大
魚殺三牲以醺之天乃甚雨七日七夜魚流始得圖書
黃帝玄女之宮戰法曰黃帝與蚩尤對力戰久不勝黃
帝歸於泰山三日三夜天霧冥冥有一婦人人首鳥形

黃帝稽首再拜伏不敢起婦人曰吾所謂玄女者子欲
何問黃帝曰小子欲萬戰萬勝萬隱萬匿首當何從起
曾子曰陰陽之氣亂則霧

龍魚河圖曰山冬天霧十日已上不除者山崩之候也
鏡圖曰古之王者行遊諸侯其所居國國必有三日浸
變而為日中之霧

陳留風俗傳曰雍丘縣有祠名曰夏后祠有神并能致
霧

漢武帝內傳曰東方朔乘雲飛去仰望大霧覆之不知所在

東觀漢記曰馬援謂官屬曰吾在浪泊西里間賊未滅之時下潦上霧毒氣薰蒸仰視烏鳶跼跼墮水中

謝承後漢書曰河南張楷性好道術能作五里霧時闕西人裴優亦能作三里霧自以不如楷往從學之楷避不肯見

英雄記曰曹公赤壁之役行至雲夢大澤中遇大霧迷

失道

魏略曰劉雄鳴每出行雲霧中識道不迷惑時人因謂
能為雲霧

望氣經曰六月三日有霧歲熟

博物志曰王肅張衡馬均皆俱冒霧行一人無恙一人
病一人死問無恙者云我飲酒病者飽食死者空腹

王隱晉書曰樂廣為尚書郎尚書令衛瓘見奇之命諸
子造焉曰此人之水鏡每見令人瑩然若披雲霧觀青

天

神仙傳曰樂巴為尚書忽一日天大霧對坐不相見失
巴所在尋問之云其日還成都親故別時亦風雨晦冥
袁山松宜都山川記曰郡西北有舟山天晴嶺忽有霧
起迴轉如烟不過再朝雨必降

詩梁孝元帝詠霧詩曰三晨生遠霧五里暗城闔從風
疑細雨映日似遊塵乍若飛煙散時如佳氣新又詩曰
曉霧晦階前垂珠帶葉邊五里浮長隰三晨暗遠天菊

通似佳氣却望若非烟疏簾還復密斷棟更疑連還思
逢樂廣能令雲霧褰

梁伏挺行舟值早霧詩曰水霧雜山烟冥冥見曉天聽
猿方忖岫間瀨始知川漁人惑隩浦行舟迷汴汭日中
氛靄盡空水共澄鮮

周王褒詠霧應詔詩曰七條開早陌五里闔朝氛帶樓
疑海氣含蓋似浮雲方從河水上預奉綠圖文

虹

禮記月令曰季春之月虹始見孟冬之月虹藏不見
釋名曰虹陽氣之動虹攻也純陽攻陰氣也又曰夫人
陰陽不合婚姻錯亂淫風流行男女互相奔随之時此
則氣盛故以其盛時合之也

說文曰蜺屈虹青赤或白色陰氣也

毛詩曰蜺蜺在東莫之敢指一名挈貳

河圖稽曜鉤曰鎮星散為虹蜺

春秋運斗曰樞星散為虹蜺

尚書考靈曜鄭玄注曰日旁氣白者為虹

莊子曰陽炙陰為虹

黃帝占軍訣曰攻城有虹從外南方入飲城中者從虹
攻之勝白虹繞城不匝從虹所在乃擊

蔡邕月令章句曰虹蜺蜺也陰陽交接之氣著於形色
者也雄曰虹雌曰蜺蜺常依陰雲而晝見於日衝無雲
不見大陰亦不見率以日西見於東方故詩云蜺蜺在
於東蜺常在於旁四時常有之唯雄虹見藏有月

戰國策曰唐睢謂秦王曰聶政刺韓傀白虹貫日

烈士傳曰荊軻為燕太子謀刺秦王白虹貫日

異苑曰古者有夫妻荒年菜食而死俱化成青虹故俗呼美人虹

又曰晉陵薛願義熙初有虹飲其釜澳喻響便竭願輦酒灌之隨投隨涸便吐金滿器於是災弊日祛而豐富歲臻

楚辭天問曰白蜺嬰茀胡為此堂

蜺雲之有色似龍茀白雲萎蛇者也又

曰虹蜺紛其朝覆兮夕淫淫而霖雨

賦梁江淹赤虹賦曰俄而赤蜺電出蚺虬神驤曖昧以
變依稀不常非虛非實乍滅乍光艷赫山頂照燎水陽
雖圖緯之有載曠世識之未逢既浴嗟而躑躅聊周流
而從容餘形可覽殘色未去曜萎蕤而在草映青葱而
結樹霞晃朗而下飛日通籠而上度

詩董思恭詠虹詩曰春暮萍生早日落雨飛餘橫彩分
長漢倒色媚青渠梁前朝影出橋上晚光舒願逐旌旗

轉飄飄侍直廬

蘓味道詠虹詩曰紆餘帶星渚窈窕架天濶空因壯士
見還共美人沉逸勢含良玉神光藻瑞金獨留長劒彩
終負昔賢心

藝文類聚卷二